

Wednesday, February 26, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

MOA SIGNED

Mizoram Sorkar chuan 'bana kaih' ruahmanna atan CGTMSE (Credit Guarantee Fund Trust for Micro and Small Enterprises) scheme chungchangah SIDBI nen nimin khan thawhhona thuthlung Memorandum of Agreement a ziak.

He inremna hi Mizoram State Policy Coordination Committee Vice Chairman Dr. KC Lalmalsawmzauva hriatpui-in Commissioner and Secretary, Commerce & Industries Pu Lalzirmawia Chhangte leh CGTMSE CEO Pu Manish Sinha ten an ziak a ni. CGTMSE hi Sorkar laipua Ministry of Micro, Small & Medium Enterprises (MSME) leh Small Industries Development Bank of India (SIDBI) in thil siamchhuahna leh sawngbawlna pek kaihhnaih eizawna hrang hrang, lian tham si lo te'n an hmalakna atana sum mamawh phuhruk tura awlsam zawka loan an lak theih na'n a ruahman leh kalpui a ni a. CGTMSE hnuaiah hian MSME loan la te chu an loan lak atanga za zela 75 atanga 85 thleng guarantee pek sak a ni thin a; hemi atan hian loan la tu in fee a chawi a ngai thin. Bank lam tan risk a la san deuh avangin loan dilna tam tak hnawl a lo ni tawh thin a. SIDBI nena Mizoram sawrkar inremna hnuaiah hian Mizoram Bana Kaih ruahmanna atangin za zela 95 thleng guarantee tih san a nih dawn bakah Mizoram sawrkar chuan Guarantee fee a tum sak vek dawn avangin dahkham leh guarantor ngai lovin awlsam zawkin loan a lak theih dawn niin sorkar thuchhuah chuan a tarlang.

MSPCC Vice Chairman Dr. KC Lalmalsawmzauva chuan nimina inremna ziah naah hian Progress Partner-te bana kaihna tur hian Mizoram sawrkar chuan loan rul tha te chu loan pung an rulhna a rul let zel tur thu a sawi. MoA ziahnaah hian Partner Bank - State Bank of India, Mizoram Rural Bank, Mizoram Cooperative Apex Bank leh Finance Department aiawh te bakah Bana Kaih ruahmanna hnuaia Nodal Officer te a tel a ni.



LADC

ZPM-in Lai autonomous district council (LADC) a sorkarna an siam vawikhatna tur atan ZPM legislature party hruaitu Pu V. Zirsanga chu naktuk hian CEM atan lakluh a ni dawn.

Hemi chungchangah hian Thawhtanni khan district council & minority affairs secretary Pi Sangchhin Chinzah chuan hriattirna chhuahin ZPM legislature party-in hruaitu atana an thlan Pu V. Zirsanga chu larsap Gen. VK Singh pawmpuina-in CEM atan ruat a nih thu a tarlang a. CEM atana ruat a nih atanga ni 30 chhungin LADC-ah sorkarna siam thei tura thlawptu MDC a ngah tawh leh ngah tawh loh finfiah tura tih a ni bawh. He hriattirna chhuah zulzui hian LADC a executive secretary Pu K. Lalthanzara chuan nimin khan thu a chhuah a. Pu V. Zirsanga hi Ningangi chawhma dar 11.30-ah LADC hall-ah thutiamtir a lakluh a nih tur thu a sawi a. Thutiamtirtu tur hi Lawngtlai bawrh sap a nih thu a tarlang bawh a ni.

LADC-ah hian tun term chung ringawtah pawh politics a inlumlet nasa hle a. Pu V. Zirsanga hi CEM atana lakluh a nih chuan tun term chhunga CEM palina a ni dawn a, tun term chung veka CEM dinhmun a chelh vawi hnihna a ni dawn bawh. Nikum May ni 7 atanga thuneihna chelh tan CEM Pu C. Lalmuanthanga kaihhrui MNF leh Congress sorkar intawm chu February ni 12 a Council inkhawma phar thlak tum a nih laiin Pu C. Lalmuanthanga'n larsap hnena banna a thehlut tak avangin thlawptu a ngah tawh leh ngah tawh loh fiah ngai lovin sorkar chu a tlu ta a. MDC 10 nei sa ZPM chuan a hma lawka ZPM zawmtu BJP MDC awm chhun thin Pu T. Zakunga leh MNF MDC pahnih Pu V. Zirsanga leh Pu Lallawmsanga Apetow te'n an zawm tak hnu-in LADC-ah sorkarna an siam thei tih larsap an hriattir a ni.

Kum 2020 tawp lama LADC inthlanah khan, MNF chuan bial 25-ah bial 20 la-in chiang takin hnehna an chang a. MNF legislature party chuan Pu Manghmunga Chinzah kaihhruiaina hnuaiah Sorkarna an an siam a, Pu Manghmunga Chinzah hi December 14, 2020 ah CEM atan lakluh a ni. August 27, 2021 ah MNF legislature party atang thovin Pu V. Zirsanga chuan Pu Manghmunga Chinzah paihtla-in CEM thuthleng a luah ve leh a. Pu V. Zirsanga hi nikum January ni 22-a Aizawl a special court (prevention of corruption)-in eiruk thubuai a thiam loh chantira kum 4 tang tur leh cheng nuai 4 chawi tura a tih hnu lawkah LADC sorkarah buaina a inlung tan ta a.

Pu V. Zirsanga laka hel MNF MDC 8 leh eptu lamin eiruk thubuai a thiam loh a chan changchawi a paihtlak an tum laiin nikum March ni 7khan banna a thehlut ta a. Sorkar kal mumal thei lova engemawchen a awm hnu-ah thla khat leh a chanve vel LADC chu governor's rule-a dah a ni ta a. Hemi hnu hian Congress leh MNF ten Sorkar intawm siamin nikum May 7, 2024 atang khan Pu C. Lalmuanthanga chuan LADC a kaihhrui leh a. Tunah ZPM a sorkar ve dawn ta niin a lang. Dan pangngai ang chuan kumin kumtawp lamah LADC ah hian inthlan huaihawt tur a ni ang.

Hetih lai hian Mizoram Pradesh Congress Committee chuan eiruk thubuai a court-in thiam loh chantir a kum 4 tang tur leh cheng nuai 4 chawi tura a hrem tawh Pu V. Zirsanga CEM a dah leh a ni chu an dem thu an sawi a. Eiruk thubuai a thiam loh chantir a hrem a nih hnu nikum February ni 7

khan ZPM thalai chuan Pu V. Zirsanga chu CEM ni zui zel tlaka an ngaih loh
thu thuchhuah siamin an lo tarlang tawh a ni, an ti bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl
Youtube Channel, All India Radio News Aizawl Facebook page leh
newsonair.gov.in ah te chanchinthar hi ngaihthlak leh chhiar theih a dah a ni.
Zanin dar 6 leh a chanve-ah Chanchinthar hi puan leh a ni ang.

